

## **Kaunop nan Priesthood: “I Anahne Ahmw Sawas”**

*Sang President Henry B. Eyring  
Sounsawas Keieu nan Presidensi Keieu*

Riei ohl akan, e kaperen ong ie en mih rehmwail nan miiting wet en priesthood en Koht nan sampah pwon. Pwohnget I pahn koasoia kaunop nan priesthood, koaros pein atail oh me kitail kin sawaskihda ong mehteikan.

Pali laud en kitail kin pein medewe, “I kaunopohng doadoahk wet nan priesthood?” Ahi pasapeng iei “Ehng, ke kaunopehr.” Me I men wia rahnwet iei en seweseikumwail kasawiada kaunop wo oh ahniki soupeikasal.

Ni duwen amwail esehier, Priesthood en Aaron koasoandi en wia priesthood en kaunop. Pali laud iei dihken pwulopwul kan, sounpadahk kan, oh priest kan nanopwungen sounpar 12 oh 19.

Kitail mwein pahn medewe me kaunop nan priesthood kin wiawi nan sounpar akan en Priesthood en Aaron. Ahpw Samatail Nanleng kaukaunopkitalehr sangete atail padahk Reh nan Sapwellime wehi mwohn atail ipwid. E ketin kaukaunop kitail pwohnget. Oh E pahn ketin doula kaukaunop kitail erein atail pahn mweidehng.

Kahrepen kaunop koaros en priesthood, nan mour mwohn met oh nan mour wet, iei en kaunop kitail oh aramas me kitail kin papah pwehki Ih ong mour soutuk. Ekei tepin padahk kan nan mour mwohn met uhdahn mwein iangahki pilahn en komour, poahsoankihda Sises Krais oh Sapwellime Tomwo. Kitail sohte kin alehdihte padahk duwen pilahno ahpw mihami nan konsel kan wasa me kitail pilada.

Pwehki irair en limanoknok me pwaindi atail mwahliel kan ni atail ipwid, kitail kin anahne rapahkisapahl nan mour wet dahme kitail kin ese sangete mahs oh uhki. Kisehn atail kaunop nan mour wet iei en diarada mehlel keneineio pwe kitail en kak pwurehng inoukihieng sapahl. Met anahne pwoson, karakarahk, oh soupeikasal sang kitail iangahki sawas sang aramas me diarehr mehlelo oh uhd ehukiheng kitail.

Aramas pwukat kak wia pahma nohno kan, misineri kan, de kompoakaph kan. Ahpw sawas wo wia kisehn atail kaunop. Atail kaunop nan priesthood kin ansou koaros patehng mehteikan me kaunopehr en kiheng kitail ansou mwahu en alehda rongamwahuo oh eri pilada en mwekidki sang ni kolokol inou sarawi kan pwe ren loalehdi nan mongiongirail kan. Pwe kitail en warohng mour soutuk, atail papah nan mour wet uhdahn anahne iangahki doadoahk ni mohngiong, madamadau, oh kehl unsek oh nantiheng kaunop aramas teikan en iang kitail pwurala rehn Koht.

Eri kisehn kaunop nan priesthood me kitail pahn alehdi nan mour wet iei ansou mwahu kan en papah oh padahkiih mehteikan. Met iangahki en wia sounpadahk kan nan Mwomwohdiso, pahma me eripit oh limpoak, tote kan en pwihn, oh misineri ong Kauno. Kauno pahn ketkihda ansou

mwahu kan, ahpw ma kitail kaunop de soh pahn pahtsan pein kitail. Me I ngoangki pwohngget ie i en kasalehda ekei pilipil kesempwal kan me anahn pwe kaunop nan priesthood en pweida.

Pilipil mwahu kan sang koaros aramas me kihda kaiahn oh me alehda kaiahn pahn pahtsan wehwehki ekis duwen Kauno eh kin ketin kaunop Sapwellime sounpapah kan en priesthood.

Keieu, E kin ketin malipe aramas, pwulopwul oh mah, me kakete ong sampah, oh lella ong pein irail, mwomwen luwet oh sohte uhdahn loalokong. Kauno kak ketin wekidala souitar pwukat ong kehlail kan. Kasawiada met pahn wekidala wiepe me kaun eripit men kin pilada en kaiahn. Oh e kak wekidala duwen emen me kol priesthood eh pahn doadoangki ansou mwahu kan en pweida me kin kohieng ih.

Kitail medewe mahs ekei karasaras kan. I wia priest soakoahiek men nan ward laud ehu. Ahi pisop delepwohndo mwurin souwas en Rahn Sarawi ehu. Ni ei sapeng delepwohno, e nda, “Mie ahmw ansou en iang ie? I anahne ahmw sawas.” Ihte me e nda me e men ien iangih kohla pwarek lih emen me I sehse ahpw me sohte kene mwonge oh me anahne esehla en apwalih mwahu nah mwohni.

I ese me mie nah sounsawas koahiek riemen nan ah pisoprik. Koaros wia ohl mehlel me uhdahn koahiek. Emen sounsawas ahniki pesnes laud ehu oh mwuhr wiahla president en misin oh emen Kaun Lapalap. Sounsawas teioiei sounkopwung kesempwal men.

Ngehi I wia nein pisop sounsawas keieu nan pwihen priest kan me ahpwtehn malipilipda. E ese me I sohte nohn wehwehki duwen padahk kan en sawas. Me I ese me pid duwen apwalih mwohni pil ahpwete tikitiksang. I saikinte ntingiada tek, sohte nainiki pwuken bank, oh saikinte kilang doaropwehn koasoandi en mwohni. Ahpw, mendahte ahi soakoahiek, I pehm me e mehmehlel douluh ni eh nda, “I anahne ahmw sawas.”

I wehwehkihlahr dahme pisop kamaraindao wiewia. E kilangada rehi ansou mwahu en kaunop emen me kol priesthood. I koapwoaroapwoarki me nan kisin pwutak soakoahieko e sohte kilangada emen me pahn ehu rahn wia tohn Pisoprik Me Kakaun. Ahpw mwomwe ong ie rahno, oh rahn akan koaros me I ese ih erein sounpar akan kohkohdo, e wiahkinie doadoahk en kaunop me ehu rahn kak mie katepe.

E mwomwen pereniki, ahpw e wia doadoahk ehu ong ih. Ni aht pwurpwurala nihmweio mwurin aht pwarek liohdi me anahne sawaso, e kauhdi sidohsao. E pahkpeseng nah pwuhk sarawi kan me meringlahr oh ntิงseli loale. E kapwungie ni kadek. E ndahieng ie me I anahne onop oh esehla laudsang me I ese. Ahpw mwein e kilangada me I luwet oh sohte nohn loalokong itar pwe ien kak rong padahk. Lel rahn wet I tamataman dahme e padahkihieng ie. Ahpw me I keieu taman iei duwen ah koapwoaroapwoarki me I kak esehla mehkot oh ahpwete mwahusang mahs—oh me I pahn mwahusang mahs.

E kin kilengla daulih uhdahn ihs ngehi ong dahme kak me mih loalen aramas me pehm me e luwet oh karakarahk itar pwehn rapahki sawas en Kauno oh en kamehlele me e pahn kohdo.

Pisop kan, president kan en misin, oh paahpa kan kak pilada en mwekidki kak pwukat. Rahnteiohte, I kilang eh wiawi ansou me president en pwihn en dihken kan kihda ah kadehde nan mihting en kaisihsol. E pahn wiahlahr sounpadahk men oh kohkohsang iengehkan.

E kadehde ni pepehm laud nan ngile duwen keirdahn mwahu oh manaman rehn towe kan en ah pwihn. E kepinga arail papah. Ih eri nda me e ese me e sewese dihken kapw kan ni arail pehm me re toutoula pwehki e ahniki pepehm en sohte kakehng eh pwukoa ni eh tepido nan priesthood.

Ah pepehm en souitar kan elehieng ih en ahniki laudlahn kanengamah, nsenoh, oh eri ahpwete kak en kakehlailih oh papah mehteikan. Nan sounpar riau pwuko e koahiekla oh ahniki eripit. E esehla me e alehdi sawas duwen president en quorum sang ni kataman sansal en pein ah anahn kan ni eh sounpar riau pwulopwulsang mwo. Me ih oh kitail pahn kahpwalki ehu rahn iei ansou me ketemen pwukat pahn sohrala oh rotorotala pwehki ansou oh atail pweida kan.

Pohl mweinte kilang keper wet ni eh kaweid ienge me pwulopwulsang nan priesthood, Timoty. E kangoange oh kaweidih nan pein ah kaunop nan priesthood oh nan sewese Kauno kaunop aramas teikan.

Pohl mahsanihong Timoty:

“Ke dehr mweidohng emen en mwamwahlikin uhk pwehki omw pwulopwul, ahpw ke en wia mehn kahlemengih ehu ong irail kan me pwoson, ni omw koasoi, ni omw tiahk, ni omw limpoak, ni omw pwoson, oh mwakelekel.

“Lel ei pahn pwarowei, nantihong wadewadek Pwuhk Sarawi ong aramas akan, oh padapadahkoh oh panapanawih irail.

“Ke dehr mwamwahliki kisakis en ngehn me mihmi rehmw, me kohienguhkehr ni ahnsou me soukohp akan mahsen oh me mah kan pwil pehrail pohmw ...

“Kanakanahieng pein kowe oh pil kanahieng omw padahk kan;<sup>1</sup> nantihong wiewia soahng pwukat, pwe ma ke pahn wia, ke pahn doarehla pein kowe oh pil irail kan me kin rong uhk.”<sup>2</sup>

Pohl ketikihda kaweid mwahu ong kitail koaros. Dehr pwunodiki duwen omw soakoahiek ahpw medewe dah, sang ni sawas en Kauno, me ke kak wiahla.

Padahk me Pohl kangoangehkitail en ngoangki ni atail kaunop nan priesthood iei sapwellimen Krais mahsen kan oh eri en warohng alehdi Ngehn Sarawi. Kitail eri pahn kak ese duwen me Kauno ketin kupwurki kitail en papah oh alehdi soupeikasal en wia, sohte lipilipil irair me kitail sohpai ehu rahn.

Kitail wie kaukaunop ong papah nan priesthood me pahn ahpwete wie apwahpwalla kohwei. Paliwaratail kan kin iang kitail mahla. Atail koahiek en esehla oh taman dahme kitail wadek pahn tiktitikla. En kihda papah nan priesthood me Kauno ketin kasik sang kitail pahn anahne lalaudlahn

koahiek en kaunda pein kitail rahn akan koaros erein atail mour. Kitail kak kaunopohng kasongsongo sang ni kakairada pwoson sang ni atail wie papah kohkohwei.

Kauno ketkihiengkitailehr ansou mwahu en kaunop sang mehkot me E ketin kahdaniki kehkehlik oh inou me wia kisehn priesthood.<sup>3</sup>

E wia inou me kitail kin wiahda rehn Koht en kolokol koaruhsiehn Sapwellime kosonned akan oh kihda papah ni duwen me E pahn ketkihda ma E ketket wasaht. Momourki koasoandi wo ni uwen atail kak kin elehieng keirdahn kehl en pali ngehn me kitail pahn anahne pwehn nantiheng lel imwi.

Soun kaiahn lap kan en priesthood kasalehiengiehier duwen kakairada kehl wo. Iei en kaiahnehng nannantihwei mendahte pwang de masepwehk me kak elehieng uhk medewehda en pwilikhdi. Sapwellimen Kauno soun kaiahn kan kasalehieng ie me kehlail en pali ngehn wo iei en nantihweite mwurin mehteikan ahr kommoaldier.

Kumwail kaun kaselel kan nan priesthood me kairadahr kehlail en pali ngehn ni amwail mwahnakapw wie kolokol te kehlailo ni ansou me paliwaramwail kan luwetalahr.

Riei pwutak tikitik mihmi nan kisin kahnihmw kis nan Utah seiloangki pesnes. Delepwohn kolahng nan ah hotel-o. E wasapwongier mwurin rahn en doadoahk laud ong rieio oh pil ong President Spencer W. Kimball, me tapiada ara koasoi nan delepwohn nin duwe met. E mahsanah, “I rong me ke mih sahpwet. I ese me pwandehr oh me ke mwein meirehr . . . , ahpw ke kak seweseie? I anahne ken iangie kohseli nan kahnihmwet pwehn kilang iren atail ihmw sarawi kan.” Riei pwutako iangih nihpwongo, ni eh sohte ese duwen petehkpen epwelpen ihmw sarawi kan oh sohte ese kahrepren President Kimball eh wiewia met mwurin rahn reirei en doadoahk de kahrepren eh pil anahne sawas.

Sounpar kei mwuri I alehdi delepwohn ehu me duwehte mwo ehu nihpwongo nan hotel ieu nan Sapahn. Ansou I wia Comissioner en Kasukuhl ong Mwomwohdiso. I ese me President Gordon B. Hinckley mihmi wasahkis nan hotel-o ni eh doadoahk Sapahn. I sapeng delepwohn me wie ririhngko mwurin te ei wendihn meir, pwangada mehlel mwurin ei wiahier koaros me I leme I ahniki kehlail en wia.

President Hinckley kalelapak ni ngile mwahuo, “Dahme ke memeiriki ni ahi wie wadewadek pwuhk ehu me kita anahne tehksapahl?” Eri I pwourda kohla doadoahk mendahte ei ese me President Hinckley kak tehksapahl pwuhko mwahusang me I kakete wia. Ahpw e kihiegie pepehm me e anahne ahi sawas.

President Thomas S. Monson ni imwin kerenieng mihting koaros kin idek rehn sekteri ong Presidensi Keieu, “I kapwaiadahr ahi doadoahk leledo met?” Oh E kin sirei ni ansou me pasapengo kin pwurodo: Ehng, President, ke kapwaiadahr.” Ahn President Monson sirei kin kihiegie ie kaweid ehu. I kin leme, “Mie me I pil kak wia nan ahi pwukoa kan?” Ngehi eri kin pwurala ni ei ohpis oh doadoahk.

Sounpadahk Lap kan kasalehieng ie duwen kaunop en kolokol kehkehliko oh inou ni ansou me sounpar oh ansou kin wiahda en apwal. I rail kasalehiengie oh padahkihiengie duwen kaiahne pein ngehi en ahpwete doadoahk laudsang me I leme I kak ni ei wie rosrosonte oh kekehlaite.

I sohte kak wia sounpapah unsek nan awa koaros, ahpw I kak song en kihda ang i laudsang me I leme I ahniki. Ni kaiahn wet eh pahn alahldi ni ahi pwulopwul, I pahn kaunop ong kasongsong kan en mwuhr. Kowe oh ngehi kak en kaunopkihda kehl en kolokol atail kehkehlik oh inou mendahte kasongsong kan me uhdahn pahn kohdo kerenzlahng imwilahn mour.

I kilangada lipwen met nan mihting en Board en Kasukuhl en Mwomwohdiso. President Spencer W. Kimball ansouo wie papahier sounpar tohto ni ahnsouohte me e ahniki soangen kahpwal kei en paliwar me Sohp kelehpw pahn wehwehki. E kaunda mihtingo nihmensengo.

E pa wiahkintehieu sohla lokaia. E mwatordi nan ah sehro. E meirpene. Moange itiekdihieng nan mwarmware. I mwohd limwah. Elder Holland mwohd limwaht. Kiht riemeno uhda pwehn sewese ih. Ni aht soakoahiek, se koasoanehdii en wahda ih, wie mwomwohdt nan ah sehro, walahng nan ah ohpis me kerendohte.

E wiahla aht sounpadahk nan irair en kahpwalo. Ni aht emente wie kolokol apali ah sehro, se pidohisang nan perehn mihtingo. E duwarpeseng ekis, ni eh saikinte nohn kehn wasa, oh nda, "Oh, menlau kanaiehng. Dehr kamedekehla tihnsuwemwahkan." Ni aht kerenzlahng wenihmw en ah ohpiso, e nda, "I nsensuwedkilahr ei kasapwungehla mihtingo." Minit kei mwurin aht wahla ih nan ah ohpiso, e kilengda oh ndahngkit, "Kumwa seu leme kumwa konehng pwuralahng mihtingo?"

Se kohkohla oh mwadangete pwurala, ni aht ese me aht mihmi mwo mwein katapan ong Kauno. Sangete ni ah serio, President Kimball kin nantiheng daulih uwen me e kak pwehn papah oh poakohng Kauno. E wia mehkot me uwen eh ahnla mihmihte reh ni ansou me e anahne. E kaunop. Oh iei duwen eh kak en padahkihkit oh kasalehieng kiht duwen kaunop pwehn kolokol kehkehliko oh inou, sang ni wie kaukaunop nan sounpar kan kohkohdo doadoahngki aht kehl koaros nan me mwomwen wia kisin doadoahk kan me sohte lipwe laud.

Ahi kapakap iei me kitail en kolokol atail inou kan en priesthood pwehn kahrehieng pein kitail en warohng mour soutuk oh pil mehteikan me kitail kin kaiahne. I inoukihieng kumwail me ma kumwail pahn wia uwen me kumwail kak, Koht pahn ketin kalaude amwail kehl oh amwail eripit. E pahn ketin kakoahiek kumwailla.

I kadehde me Koht Sahm ketin ieias oh poakohng uhk. E ketin mwahngihiuk. Ih oh Sapwellime Iehros linganla iasadao, Sises Krais, ketin pwarodong pwutak soakoahiek, Joseph Smith. Ira ketin kepukoahkinh Kopwurupwurdohn rongamwahuo oh mwomwohdiso mehlelo ni unsek. Ira ketin kangoange ih ni ansou me e anahne. Ira ketin mweidehng en kehn lipwoar me limpoak ni ansou me e pahn kihdi ih pwehn pwokpwokda. Ira ketin kaunop ih, oh Ira ketin kaukaunop kitail, pwehn ahniki kehlail en wie doadoahkte ong kilohri celestial me iei me kitail nannantiheng oh iei kahrepapah koaros nan priesthood.

I pwilikhdieng kumwail ahi kapai me kumwail pahn kak kasawiada ansou mwahu kaselel kan me Koht ketkahieng kumwail ni malipe oh kaunop kumwail ong Sapwellime doadoahk oh doadoahk en papah mehteikan. Ni mwaren atail kaun oh sounpadahk limpoak, Sises Krais, ahmen.

Iren Sawas Akan

1. Tehk 2 Nephi 32:3–6.
2. 1 Timoty 4:12–14, 16.
3. Tehk Doctrine and Covenants 84:39.